

### **Kronikë ilire**

Në fillim ishin zogjtë, lumenjtë, ilirët  
Hanin ilirisht dhe punonin ilirisht tokën  
Lindnin dhe vdisnin lirë, çlirshëm, ilirisht

Pastaj erdhën turrë-turrë nga perëndimi  
Kërkonin tokë ilire, qiell, ujë ilir  
U thanë: i paskeni të artë gurët, të bukët tokën

Pastaj erdhën turrë-turrë nga lindja  
Kërkonin tokë ilire, qiell, ujë ilir  
U thanë: i paskeni këngët dhe kafkat të bukura

Deshën t'i vënë në një tumë, deshën  
T'u japin balsamin e luleve

## **Kashelashë për atdheun**

Atdheu është dheu i birit e i atit e i shpirtit të shenjtë

Në vargun me krushq atdheu është krushku i parë  
Në të tëra meshat shenjte ai është Meshari  
Në kulm e në flamur është kumti e kremtja  
Në kokën rënduar në mendime ai është mendimi

Është një krah shqipeje këtej, një andej kufirit  
Është flaka e Oso Kuka në kullën kallë të barotit  
Është ara shtatë vjet djerrë e gruaja djerrë e fara

Në bukë e kripë e zemër atdheu është zemra  
Në të parën pushkë për ujk atdheu është krisma  
Në trupin tonë për vig atdheu është vigu  
Në mishin tonë për krimb atdheu është ashti

Atdheu është treni në binarin nëntë, buleta për nesër  
dhe trasta

### **Nisja e mërgimtarëve**

Lamtumirë në trasta, lamtumirë në ajër  
Në sy lamtumirë  
Koha në dysh po këputet, orë e trishtë po rri  
Mbi kokë me sëpatë të madhe  
Trupa të avullt të grave, motmote të njoma  
Ofshe të nënave, na pritni  
Le të rriten bimët e fëmijët, etja le ta marrë  
Zogun e zërin e kripën  
Vetëm udhët le të plaken, le t'i zbardhet floku  
Nisjes sonë, jo kthimit,  
Udhë e zeza, gjarpër i gjatë, na hëngre  
Na shpure përtej harrimit

### **Koha e krimbave**

Dalin kryezez, kryeverdhë, nga vullnet i vrimave  
Turren, terr në sy, myshqeve, mendimeve, muranave  
Trup e tërthori u bien trupave të palëndshëm  
Sa marrin trok lëngatave, sa kalërojnë ligësive  
Lakmojnë krimbas, zhbirojnë, gropojnë, krimben  
Në kënaqësi të zeza, gëzohen zi, cimbojnë me të zezë,  
Marshim i jargët i tyre zvarret tryezave, shikimeve  
Bien në dy gjunjë, luten të marrë mot i lëmashkët  
Hipin shoq më shoq dhe shpallin kremten e krimbave  
Shih si lëvrijnë, si i shtyn me gisht të madh koha  
Shenjtë Shënkoll, po tallemi apo na mori krimbëria

## Epikë

Mos na qoftë e shkruar ku në pergamenë  
Të jetë kjo njajo herë kur çelet qielli  
Mbi kokë tonën një herë në njëmijë vjet  
Të zbresin perënditë në tokë e të shohin  
Si i vdes gjallë e i gjallon vdekur fara  
Bimës ilire gjithherë në bark ujkonjash  
Theku i lashtë si i thinjet padrejtësive  
Të reja, djalë pas djali tek përshkohet  
Ashtit të vet zhbiruar Kosovë më Kosovë  
Ku, siç thotë një këngë kreshnike a Fishta  
“Fort po ndrit njaj diell e pak po nxen”  
Zogjtë e shqipes nën këtë rribë Ballkani  
Kah përditë po shkul fërtyma e mortshme  
Nga grunajat kallinj të djegur në hënë  
Nga flokë vashash nusëri të panusëruara  
Nga djem nënash lulëkuqe prej gjakut  
Zbrit, Tomor, e rri krye më krye me krerë  
Na e rrit orën, na e burrëro pak tëfillin  
Nuk po e di, për Zotin, për kokë të fjalës  
Të mbytem në det a të Bajramcurrem në male

### **Mallkimi i anatemës**

Mirë se na vjen ikje, atdheu ynë i moçëm i madhi  
Europë e Bashkuar, e Lirë, po të pushtojmë me ikje  
Një nga një po të marrim metropolet, Paktet, Antantat  
Atje tek s'na le po të lëmë vetëm mallkimet dhe vigjet  
Ne nëse s'kthehemi udhët qyqvetëm do të kthehen  
Oborreve barore të mbjellin shkopinj të bardhë e lule  
Kullave tona guri t'u vënë plisa të bardhë në krye  
Shqip diç t'u flasin drurëve, lejlekëve, gjinkallave  
Teksa shesheve dhe parqeve tua të na zërë hidhur fara  
Carroj të kuq të cilëve qumësht e gjak u mjelin nënat  
Në bodrume të mykëta pëlcastin të kërthndeztë si thana  
Rriten plot flakë lotin, plot pulpat lëng mashkullori  
Në daç ndërzejnë shqip, në daç vdesin danisht, flamançe  
Ata do të t'i ngulin trupit fëmijët e tyre dhe varret  
Cep më cep të ta vizatojnë me to "Shqipërinë e Madhe"  
Hartën e lëkurës së vet, e ti rripe, qepju qyrk Paqeve  
Na herre, anatemë, na shembe të shembtë eksodiada

### **Nokturno për zogun**

Një Zot e di ku ishe  
Kur u ndanë shpendëve qiellin

Ujin e ajrin t'i gozhduan  
Këtu ku po të ha miza hekur

Të thanë të lakmosh ylberin  
Të jesh zog pa asnjë këngë

Ti u bëre etje e vetëtimave  
Fishek i zi përkrye kokave

I bukuri, i kreshpëruari, kuqeziu

## **Një minutë heshtje**

Koha në kohë  
Le të ndalet, shiu në shi

Mosha në trup të njeriut

Lumi le të ndalet  
Në lumë dhe udha në udhë

Le të rritet vetëm tërfilli

Fryma frymë  
Të mos marrë, as floku të bardhë

Ata po parakalojnë